

Uunga siunnersuut: Nappaatit tunillaassortut akiorniarlugit iliuitsit pillugit Inatsisartut peqqussutaata allanngortinneqarnera pillugu Inatsisartut inatsisissaat nr. xx, xx. xxx 2018-imeersoq.

(KANUKOKA-p matuneqarnerata kingorna tunillaassortunik nappaalanersuaqarneranut ataatsimiititaliarsuarmut ilaasortanik toqqaariaatsimik allanngortitsineq kiisalu inatsisitigut pisussaatitaasut akiligassinneqartarsinnaanissaannut tunngavissamik ilanngussineq)
(Peqqissutsimut Iisimatusarnermullu Naalakkersuisoq)

Saqqummiussinermut allakkiaq

(Peqqissutsimut Iisimatusarnermullu Naalakkersuisoq)

Siullemeerneqarnera

Naalakkersuisut sinnerlugit maanna nappaatit tunillaassortut akiorniarlugit iliuitsit pillugit Inatsisartut peqqussutaata allanngortinneqarnera pillugu siunnersuut saqqummiuppara.

Kommunit Kattuffiat (KANUKOKA) aalajangerpoq kattuffik ulloq 31. juli 2018 matuniarlugu. Tamanna ilutigalugu inatsimmi maanna atuuttumi kommunit peqatigiiffimmut ilaasortaattallit sinnerlugit KANUKOKA-p ilaasortassanik toqqaallunilu isumaqatiginninniarsinnaatitaanera pillugu aalajangersakkat nutarterneqarnissaat pisariaqartinneqalersimavoq.

Siunnersuutigineqarpoq tunillaassortunik nappaalanersuaqarneranut ataatsimiititaliarsuarmi ilaasorta qaalajangersakkat maanna atuuttut naapertorlugit KANUKOKA-mit toqqaarneqartartoq tamatuma kingorna Inatsisartunut qinersisoqareernerani kommunit peqatigiillutik toqqartalissagaat. Naalakkersuisut ilaasortassamik toqqaanissamut inatsisitigut tunngavissinneqarput kommunit ataatsimoorlutik toqqagassaannik toqqaanissamut isumaqatigiissinnaanngippata, Naalakkersuisut kommunit inassuteqaataasa akornanni ilaasortassaq toqqassagaat.

Inatsisartut peqqussutaani atuuttumi imaluunniit Inatsisartut peqqussutaat naapertorlugu nalunaarutunik saqqummersinneqarsimasuni aalajangersakkani ilanngunneqartunik unioqqutitsinermut inuk akilisussanngortinneqarsinnaavoq. Assiganik atuuppoq Inatsisartut peqqussutaanni aalajangersakkat ilanngunneqartut naapertorlugit saqqummiunneqartunik inuk peqqussutunik unioqqutitsisimappat imaluunniit peqqusineramik malinnissimanngippat.

Taamatut unioqqutitsisimasunut inatsisitigut pisussaatitaasut assersuutigalugu suliffeqarfiit, peqatigiiffiit pisortaqarfiillu akiligassiissutigineqarsinnaanngikkallarput. Tamanna siunertarineqanngilaq atortitsiniarnermullu tunngatillugu inatsisartut peqqussutaat

tunnngavigalugu ajornartorsiortitsisinnaalluni. Taamaattumik siunnersuutigineqarpoq pillaasinnaatitaaneq inatsisartut peqqussutaa § 29-miittoq inatsisitigut pisussaatitaasut ilanngunneqarsinnaanngorlugit annertusissasoq.

Inatsisartut peqqussutaat maanna atuuttoq aamma taaguutit arlallit pisoqalisimapput. Taaguutit taakkua inatsisissatut siunnersuummi iluarsineqarput taamaasilluni taaguutit ullumikkut atuuttut atorneqarlutik.

Taamatut oqaaseqarlunga Naalakkersuisut sinnerlugit siunnersuut Inatsisartunut suliassanngortippara.